



EVANGELICAL BAPTIST CONVENTION

(Regd No.2294 of 1977 under Societies Act XXI of 1860; FCRA Regd No.194160016 of 1985 with Ministry of Home Affairs and Income Tax PAN NO AAATE5460E)

Headquarters: DORCAS HALL, NEW LAMKA
P.O. BOX 6, CHURACHANDPUR
MANIPUR – 795 006, INDIA

Phone: +91-8259014118
Email: ebc.india@gmail.com
Website: www.ebc-india.org

THU-UP POMNA LAI

Thu-up Genkhiatna:

Evangelical Baptist Convention a Saptuam member koute'n a mi malmal leh a pawlpi in a nuaia thute ka um uh a, ka sinsak uhi.

- Laisiangthou:** Thukhun Lui laibu 39 leh Thukhun Thak laibu 27 kigawm Laisiangthou, thumal leh a vekpi-a Pathian' hatkhiak thu, a kigelhna masa-a a diklou omlou, up ding leh zuih ding a thuneihna sang bel leh a tawp ahi, chiin ka um uhi.
- Pathian:** Pathian hing leh dik om sun khat hi a, tangtawn Kha a hipa, tawp neilou, A hihna, pilna, vangletna, om gigena, khat hihna, sianthouna, diktatna, hoihna, thutakna, vaakna, leh itna-a kikheng lamdang ngeilou, mi hihna-a thum: Pa, Tapa leh Khasiangthou-a om, Pathianna-a kibang, mi hihna-a a tuam, hoihbukimna a aneihte uh kibang, nasep thua tampite-a kituaka semkhawm den hi, chiin ka um uhi.
 - 2.1. Pa Pathian:** Pa Pathian pen bangkim a a bul, kha/hinna nei khempeuh a ding a Pa hihna nei den; Ama'n leitung khuavannuai a a Tapa tawh Kha Siangthou hon sawl a, Pa bel sawl a ompa hi ngeilou; Pa bel, pianthakna tungtawn a mihingte' Pa hihna hong nei, a umte' sung a teeng, Pathian' pianken tang a/nei a hon bawl, A tate hong chi, a khelhnate uh ngaidam a/maisak a, a thumnate uh dawng hi, chiin ka um uhi.
 - 2.2. Tapa Pathian:** Jesu Khrist, Pathian' Tapa a kiminlawh, mihing a hong suak, nungak siangthou sung pan a piang, mi khempeuh khelhnate khuhna hi-a sik leh tang a hong kipia, han khuk pan a A pumpi mahmah a thoukik; Amah vantung a paitou a, Pathian' kumpitutphah mai a eite' Siampulian leh Gensakpa-a om; Amah Pathian leh mihing hikhawm, amah Mi hihna lamdang sung a pianken nihte kikhen theilou hi, chiin ka um uhi.
 - 2.3. Kha Siangthou Pathian:** Kha Siangthou Pathian pen Mihihna nei hi a, a nasep- khelhna, diktatna leh thukhenna phawksak, mihingte kiang a Khrist latsak, a kisik a um mikhialte Khrist' pumpi-a baptistlut, a um mi a pianthak tawh kiton a sungluah pah a, chiamtehna kip hi pah; hong sungluahna pen a nasep tuam tuam – khamuanna, hihsiangthouna leh sian-sakna ah kilang; a um mi pen Khrist-a a kipiakzawhna bangbang a Kha Siangthou tawh kidim hi, Amah mah in a um mi leh saptuam pawlpi, biakna leh tangthupha phuanna leh nasepna ah mitvaksak a, vangletna neisak hi, chiin ka um uhi.
- Siamchilna:** Pathian in vanzat dang neilou-a bangkim siam hi; thil khat peuh thil dang apan amah-a piang toutou hi chi-a Pathian omlou chite leh a om chite pawl khat ngaihdan tawh kikalh Genesis laibu sung a thilsiamna kigelh mah a dik ahi, chiin ka um uhi.
- Vansawltakte:** Mihing a siam ma-in Pathian in kha mi vansawltak kichi tampitak na siamkhin zou a, amaute lak a tampi in a siangthouna dinmun uh lenkipin Pathian bia uh a, leitung a A mite na sem uhi.
- Setan:** Tua kha mite lak a khat, vansawltak tungnung Lucifer kichi pen kisaktheihna khelhna sung ah puk a, Setan chih hong hi a, a pawlte tampitak tonpih a, amaute dawite hong hi uh a, a tup a ngim siangthou loute seppih uhi, chiin ka um uhi. Setan a taktak, mihinna tuam nei, khelhna omsakpa, mihingte suangtubulte a diklou lam a na puksak a, amaute leitung khuavannuai ukna suhsak a, ama' thunuai a koihpa; Pathian' melmapa, Pathian' mite hekpa, Pathian' nasepte leh

thutak zul a a limching a kisalaha ahi. Amah Jesu Khrist Khros' ah mawhpaih hita a, tu hun ah Gimthuakna tun in kisalah mah leh, a tun nading sehsa Meidil (Lake of fire) hi a, kumsang bei Chiang a tua-a paihlut hi ding hi, chiin ka um uhi.

6. **Mihing:** Mihing pen Pathian in amah lim leh batpih-a tangtak a a bawlpah hi a, thildang apan hong piangkhe mawk hilou hi; Mihing in ama' deihtelna in Pathian' deihdan taklatsa nial in na gamta a, Pathian mai a a khial, a mawh hong hi a, dawimangpa' vangletna nuai a lut a taang ahi hi. Hibang siat dimdemna in mihing khempeuh zelsuak a, tuachi-in, mihing pen pianken ah, deihtelna ah, gamtat ah mikhial hi a, tua in khalam leh salam sihna tun hi, mihing in Pathian' deihsakna leh lungtaina lawhkhiat nading hoihna nei peuhmah lou hi, chiin ka um uhi
7. **Hotdamna:** Hotdamna (salvation), Pathian' hehpihna hang a thawnpiaik hi a, mihing in amah hoihna leh nasep thilhih a a lawhkhiat hilou hi, hotdamna kingakna omsun bel i Toupa Jesu Khrist' sisan suahna ahi; amah mikhialte' tang a hong sihna leh hongtatna hang in Hondampa hong hi ahi. Tua hotdamna i tan theihna omsun bel khelhna kisik a thoukik Pathian' Tapa upna ahi. Hotdamna in lampi a tot ahih leh Pathian' thu leh Kha Siangthou ahi. Kha Siangthou in thu pansan in mihing lungtang ah khelhna kiphawkna a tun hi; tua hotdamna ah a um mi pen sap, diktansak, thupisak, pianthaksak, khelhna khempeuh ngaihdam, Khrist sung a Khalam vualzawlna chiteng piaik; a ummi kikep zawh man hilou-a, Pathian' keptheihna hang a tangtawn a kepbit ahi, chiin ka um uhi.
8. **Siangthousakna:** Siangthousakna (sanctification) kichi, Pathian' deihlam a, Ama' siangthouna tanpihte-a ahon bawl na thua thum a pai ahi. Amasa-in dinmun thu ah ahi a, i upna tawh kiton in, Khrist-a bukim a bawl in Pathian' mai a dinmun bukim nei i hi; A nihna ah, mailam nawt a khangtou i hi; Thumnate, Laisiangthou sim a sutnate, kivennate, mahni ki-et a kivelnate tungtawn in Khrist batna-a khawphawk a khangtou i hi; A thumna ah, Khrist hong kilatna ah Amah batna bukim i nei ding a, Ama' hon theih bukim bang in amah i thei ding a, amah batna bukim i neita ding, chiin ka um uhi.
9. **Pianken Nihte:** Khristian peuhmah in pianken nih- salam pianken leh khalam pianken, i nei-a, tuate akikalh a kidou ahi; salam pianken deihlam a nungta lou ding, Khalam pianken deihlam a nungta zaw ding, leilam deihsa apan kihem-a, Pathian limsak leh siangthou a nungta ding, sa thilte suahkhia a, khalam thilte silh ding a sap i hi; tuachi-in salam duhgawlnate pichin lou ding a salam pianken nuaisiah ding, kha ukna sung ah nungta leng Pathian' pianken i neih vualzou thei ding hi, chiin ka um uhi.
10. **Saptuam:** Thukhun Thak sung a kigen Saptuam in gen nih a nei- leitung khuavannuai uap leh tualsung saptuam. Saptuam dik khat kia a om - Jesu Khrist um taktakte kigawm, pumpi khat hiding a Kha-in a baptis, a lomkhawm pawl himai lou-a a hing, anungta pumpi, Khrist' khalam pumpi, Pentecost ni-a kipan Khrist kia a LUTANG ahihna ahi; Tualsung saptuam ahih leh tui a baptisna tang, muh theih-a bekhawm, Toupa thusehte tangkhawm, tangthupha phuangkawm, Pastorte leh upate vaihawma nei kipawlkhawm ahi, chiin ka um uhi.
11. **Thusehte:** Thuseh kichi muhtheih-a saptuam thilhih ding a Toupa seh Baptisna leh Toupa Nitakan ahi: Baptisna pen, Khros-a kilhlup, vui a om, thoukik Hondampa upna genna-a a um mi Pa toh, Tapa toh, Khasiangthou toh min a, tui a a kiphumna, tua Khristian baptisna ahi. Tua baptisna mah in, a um mi' khelhna sihsanna, a mi hinna lui Khrist tawh kivuikhawmna leh Khrist sung a hinna thak a nuntakna a limin a lak hi. Tualsung saptuama member piching hihna ding a poimawh masa hiai baptisna ahi. Toupa Nitakan in ahih leh Khrist' sihna theihgigena leh Amah tawh kipawl na, a um mite'n Khrist a tankhawmna uh thaksakna, Khrist hong paikik nading lametna, a lim a lahna leh genna ahi, chiin ka um uhi.
12. **Toupa Ni:** Nipi kal a ni masapen, misite lak apan Khrist thawhkikni Toupa ni ahi a, biakkhawmna leh Pathian' lama kipiakna a zat ding ahi, chiin ka um uhi.
13. **Hong Pai Nihveina:** Khrist a nihvei nading in hong paikik ding. Hong paikikna sawng nih a pha ding: A Sawngkhatna pen saptuam laktouhna (Rapture of the Church) ahi ding. A um mite'

lametna kipahhuai kichi ahi. Khrist mahmah, muhtheih a, Gimthuakna ma, kumsang ma, saptuamte la ding a huihkua-a hong paina ahi ding; tua hunin a um mite a nasep bangbang un thukhenna, pahtakman piakna leh Belamnou zineihna a om ding, leitung ah a umlou mite tung ah thukhenna diktat, kum sagih sung Gimthuakna a om ding; tua Gimthuakna hun kimkhat nunung Gimthuakna thupi ahi ding.

Hong paikikna sawng nihna pen Khrist kilakna, Misiangthoute tawh ton a Jesu Khrist mahmah muhtheih-a leitung a hong kumsuk ding a, vangletna thupitak tawh kum sang khat leitung a vaihawm ding a David' Kumpigam tungkhe ding hi. Tua hun chiang in diktatna, lemna muanna, nianglehtaina in tui bang in leitung a luahsuak ding. Tua hun sung in Setan henin a om ding a, thilsiam teng tung a hamsia lakkiamin a om ding a, Israel ama' gam a phuhkipin a om ding. Tua hun thupi bei chiang in, Setan in Khrist tung a helna ma-a-kai ding a, ahihhangin, zawhthalin a om ding a, tangtawn meidil a paihlutin a om ding, chiin ka um uhi.

14. Thawhkikna leh Tangtawn a omding dan: Midikte leh midikloute pumpi thawhkikna amau hun tuam tuak ah a om ding. Khrist muangte a sih phet chiangun a kha uh Khrist' omna a tung pah uh a, tua ah khawphawkna leh nopsakna neiin midikte pumpi thupina silh a thawhkikna ngak in a om uh. Tuabang thawhkikna bel saptuam laktouh hun in leh Gimthuakna hun bei hun leh, kumsang bei hun in ahi ding. A um loute (midikloute) bel a sih phet chiang un a kha uh gimthuak in a om pah uh a, Kumpitutphah Ngou Thupi maia thukhenna tangtawn mawhtanna ngakin a om uh. Tua a thukhenna a tan bangun, kha leh pumpi kizoma thoukikte meidila paihlut ahi ding uh. Beimang sipsipna hi lou ding a, khawphawk a tangtawn gawtna thuakna hi zaw ding hi. Tua mah tangtawn sihna, sih nihna hi ding hi. Midikte tangtawn hinna nei a thou ding; midikloute tangtawn gimthuakna maizumna leh simmawhna thuak a thou ding. Kumpitutphah Ngou Thupi mai a thukhenna omkhit chiang in, Lei Thak leh Van Thak om ding a, tua-ah, Pathian mahmah A mite lak a tangtawn a teengdenta ding ahi, chiin ka um uhi.

Hiai a tung ate na simna a kipan in, anuai a thugelh nang toh kituak pen thai(□) in:

☐ Hiai Thu-up Genkhiatna ka simsuak vek a, ahi bangbang in ka pomthei hi.

☐ Hiai Thu-up Genkhiatna hoihtak in ka sim a himahleh pomtheih louh hiai anuai a bang ka nei:

☐ Hiai Thu-up Genkhiatna ka simsuak a, hiai bang kupbeh nop ka nei hi:

Date

Kingentu Min

Kingentu Suai